

PADA menjalankan kuasa yang diberikan oleh seksyen 20(1) Perlembagaan UPM, Lembaga Pengarah Universiti membuat Dasar berikut:

DASAR UNIVERSITI PUTRA MALAYSIA (PELABURAN KEWANGAN) 2022

Pendahuluan


Pejabat Bursar bertanggungjawab di dalam semua aktiviti pelaburan kewangan bagi menjana pulangan yang kompetitif dan stabil. Peranan utama dasar pelaburan kewangan UPM adalah meningkatkan kepelbagaian dan mengukuhkan aktiviti pelaburan yang berterusan bagi meningkatkan keuntungan untuk manfaat UPM.

Tanggungjawab Pejabat Bursar Dalam Pelaburan Kewangan

- i. Merancang, melaksana, mengurus dan memantau aktiviti pelaburan kewangan UPM dan pengurusan dana luarnya.
- ii. Menganalisis dan membuat penilaian kewangan ke atas cadangan pelaburan UPM.

Falsafah Pelaburan UPM

- i. Menggalakkan pulangan mampan daripada pelaburan jangka pendek (Pengurusan Tunai) untuk menampung keperluan operasi universiti.
- ii. Menggalakkan pulangan-risiko yang optimum daripada pelaburan jangka panjang (Pendapatan Tetap Dan Ekuiti).
- iii. Melabur dalam pelaburan kewangan yang bersesuaian dengan UPM seperti pelaburan berbentuk konvensional beretika (tidak termasuk industri tembakau, alkohol, perjudian, jualan senjata api dan sebagainya), patuh syariah dan amalan Alam Sekitar, Sosial dan Tadbir Urus (ESG).



- iv. UPM akan melabur terus ke dalam kelas-kelas aset yang diluluskan. Peratus wajaran yang bersesuaian akan ditentukan oleh JKIP bagi memastikan UPM mendapat pulangan optimum yang selaras dengan tahap risiko agihan berkenaan.

Objektif Pelaburan

- i. Objektif pelaburan Jangka Panjang adalah untuk mencapai purata pulangan pelaburan tahunan melebihi 1% daripada penanda aras yang ditetapkan dalam sebarang jangka masa 5 tahun. Portfolio pelaburan perlu mencapai nisbah pulangan diselaraskan risiko (Pulangan/Nisbah Risiko) lebih besar daripada satu nisbah berdasarkan alokasi aset 60:40 (Pendapatan Tetap: Equiti).
- ii. Pelaburan Jangka Pendek hendaklah dibuat pada instrumen yang mempunyai kecairan yang tinggi dan mudah dikeluarkan.

Punca Kuasa Dan Peraturan Bagi Melakukan Aktiviti Pelaburan Kewangan

Dasar ini diwujudkan bagi menyelaraskan aktiviti pelaburan UPM mengikut peruntukan Perlembagaan UPM, Akta Universiti dan Kolej Universiti 1971 (AUKU 1971) serta Akta Syarikat 2016 (Akta 777) dan lain-lain peraturan /Pekeliling berkuat kuasa.


Struktur Governan Pengurusan Pelaburan Kewangan

1. Lembaga Pengarah UPM

Lembaga Pengarah Universiti (LPU) adalah bertanggungjawab untuk menentukan dan memberikan mandat pelaburan yang sewajarnya pada Jawatankuasa Induk Pelaburan Universiti (JKIP) bagi menjalankan aktiviti pelaburan.

2. Jawatankuasa Induk Pelaburan

Jawatankuasa Induk Pelaburan (JKIP) ditubuhkan oleh LPU di bawah seksyen 21(1) Perlembagaan Universiti Putra Malaysia [P.U.(A) 448/2010) dan akan bertanggungjawab terus kepada LPU, dalam hal-hal yang melibatkan pelaburan yang memerlukan persetujuan Menteri



Kewangan setelah mendapat kelulusan Menteri Pengajian Tinggi selaras dengan peruntukan undang-undang, peraturan serta pekeliling yang berkaitan serta mengawal pelaburan yang berkenaan mengikut had yang telah ditetapkan.


Pelantikan Pengurus Dana

- i. JKIP boleh melantik pengurus dana yang diberi kuasa oleh undang-undang untuk menguruskan dana.
- ii. Prestasi pelaburan oleh pengurus dana akan dipantau dan dilaporkan secara berkala di dalam JKIP.

Kerahsiaan

Semua pihak yang terlibat dengan pengurusan pelaburan termasuk Jawatankuasa, Kakitangan dan Pengurus Dana hendaklah memastikan semua maklumat dirahsiakan setiap masa dan tidak menggunakan maklumat tersebut untuk kepentingan peribadi atau kepentingan pihak ketiga.

Dibuat 10 Ogos 2022
Minit Mesyuarat LPU 165/04
[UPM/PPUU/600-1/1/PELABURAN]



**YAM TENGGU SYARIF LAKSAMANA PERLIS DATO' SERI DIRAJA
SYED RAZLAN SYED PUTRA JAMALULLAIL**

*Pengerusi Lembaga Pengarah
Universiti Putra Malaysia*